




www.BibleForChildren.org

Génesis 1




Jatíbi peokoonontianra,
Diossen nai itan mai
jonia iki.



Maira, ja anontian jaskara iti jisámabobi
iká iki; jatíbi aniparo nemín
kikinbires yamekan mapoara
iká iki, jatianra Diossen
shinan jene besenen
koshia iki.




Jatianra Diossen yoia iki: “¡Joé iwé, akin. Jatianra joé iká iki!” jatianra joé janea iki “nete”, akin, ja kikin jishtimara janea iki, “yamé”, akin. Jaskatax moa reken nete senena iki.




Japekáora Diossen yoia iki: “Jene janbiribi inon xabá ibanon, jaskáketianra janbiribi ibékonti iki”. Jatianra jaskara iká iki. Ja xabára Diossen janea iki, “nai”, akin. Jaskataxa moa jawen rabé nete iti senena iki.




Jatianra Diossen yoia iki: “Ja nai naman iká jenebo ja itinkobiribi jainbicho tsinkíkanwe, ibanon mai pikotax manxani”, akin. Jatianra jaskara iká iki. Ja manxanara Diossen janea iki “mai”, akin, itan ja jene tsinkitara janea iki “aniparo”, akin.



Jatianra Diossen oinna jatíbi jakon iketian, neskata iki:
“Ibanon nato main meskó keská jiwibi xobibo xoxoi:
Xobibo ibanon jawen xoxoti beroyabo,
jainoaxibi jiwibo jawen
xoxoti bimi
beroyabo”, iki.



Jatianra jaskara iká iki. Jaskataxa moa jawen kimisha
nete iti senena iki.



Diossenra rabé joé aká iki: Bari aká iki jan neten tenati
itan oxe aká iki, jan yamé tenati. Wishtínboribi
aká iki. Jaskataxa moa jawen
chosko nete iti senena iki.




Jainxonra Diossen yoia iki:
“Jene meran jatíbi meskó
yoinabo ichabires kaibanon,
jainoaxibi jabánon mai
manaon noyai yoinabo”,
akin. Jatianra jaskara
iká iki. Jaskataxa moa
jawen pichika nete iti
senena iki.




Jatianra Diossen yoia iki: “Nato main kaibanon jatíbi meskó yoinabo: Ináatibo itan ináatimaboribi, jainoax jatíbi main norex iki niaibo”. Jatianra jaskara iká iki.



Jatianra yoia iki: “Ramapari joni anon akanwe. Noa keskábiakin, jara jatíbinin koshi iti iki: Aniparomea yapabaona, noyai yoinabaona, ináati yoinabaona, ináatima yoinabaona, itan main norex iki niaibaonaribi”, akin. Jatianra Diossen oinna jatíbi akábo jakonshamanbires iká iki. Jaskataxa jawen sokota nete senena iki.



Jatianra ja Edén main iká jakon jati wainko, koirani
teenon ixon Ibo Diossen ja joni imaa iki, . . .



. . . jain imakinra yoia iki:
“Nato jakon jati
wainkonia jatíbi yobín
jiwi bimibora min
kokoresti iki, ikaxbira ja
jakon itan jakonma
onanti jiwi bimi, min
kokotima iki. Ja jiwi
bimi kokoatianbira mia
mawáti iki”, akin.



Jatianra Adánman jatíbi ináati itan
ináatima yoinabo, itan noyai yoinabo
janepakea iki. Jaskara janeyabo
itiakinbiribi jane pakea iki. Ikaxbira
jawe yoinabi janshamanbiribi já akinti
yama iká iki.



Jaskara iketian, Ibo Diossen Adán akonbireskin oxamaa iki, ja oxaketian westíora jawen pishi tsekaxon, jakiribi namín xepoa iki. Ja pishi tsekaxonra, Ibo Diossen ainbo aká iki, jaskáaxonra ja aká ainbo Adán menia iki, ja oinnaxa Adán neskata iki: “¡Natora nokon namibi iki, itan nokon xaobi iki! Jonimea tsekaxon Diossen aká ikaxa, jawen jane ‘ainbo’, iki”, iki.



Jaskara iketianra jonin jawen papa
betan jawen tita jenetaanan, jawen
awin betanbiribi jati iki, jaskataxa ja
rabé westíora yorabicho keská iti iki.



Akonbireskin nato netemea jonibo
noixonra, jawen jabicho bake jato
Diossen menia iki, jatíbi já ikonhaibo,
mawáyamai jatíbitian
jati neteya ikanon ixon.



Romanos 3:23 Jatikaxbira ochakana iki, jaskara kopíra moa Dios betan iamai, ochókana iki.

Romanos 6:23 Ochan kopí riki mawá, ikaxbi jawe kopímabi noa Diossen meniai riki, jawen jatíbitian jati nete, non Ibo Jesucristo betanbi itaanan.

Hebreos 9:27 Jatíbi jonira westíoraibicho mawatai, jaskata pekáora jaton akábo kopí jain bokantibo jato yoixonti nete nokotai.

Efesios 2:8,9 Ja maton ikonhaa kopíresa, jakon shinanya ixon, Diossen mato kishpinmaa iki, jakon jawéki maton aká kopíma, jara jawe kopímabi, mato Diossen imaa iki.



Romanos 10:9,10 Jaskara ikaxa, tsoabi jawebi rabíresti atipanyamake, jaton koshinbi ikanama ikax. Jawetianki min kexakanbishaman, Jesús riki nokon Ibo iki mia ikai, itan mawákenbi Diossen jirimaaribi, jointiaxonbi min ikonhai, jatianra mia kishpinmeeti iki. Non jointinin riki, Dios ikonhati jakon joni inoxon. Jatian kishpinmeeta inoxonra, non kexakanbishaman, Jesús riki nokon Ibo, iki noa iti jake.

Juan 3:16,17 Akonbireskin nato netemea jonibo noixonra, jawen jabicho bake jato Diossen menia iki, jatíbi já ikonhaibo, mawáyamai jatíbitian jati neteya ikanon ixon. Nato netemea jonibo masá tenemati kopíra ayamaa iki, Diossen jawen bake nato neten raankin. Janra raana iki, jan akinnaton nato netemea jonibo kishpinmeekanon ixon.



1 Juan 5:11-13 Jatian ja Diossen yoiai riki, noa jatíbitian jati nete menia, jatian ja jati nete iki jawen Bake ikonhaxon biti. Jaweratoboki moa ja Bake betan iki, jabora moa jati neteya iki, ikaxbi jaweratoboki ja Bake betanma iki, jabora jati neteoma iki. Enra ja Diossen Bake ikonhaibo iketian, mato neskarabo wishaxonai, moa jatíbitian jati neteyabo mato ikanai maton onannon ixon.



Génesis 1-2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: Bob Davies; Tammy S.

Shipibo Conibo Bible (shp) © 2011, Wycliffe Bible
Translators, Inc. All rights reserved.

<https://live.bible.is/bible/SHPTBL/GEN/1>

©2025 Bible for Children, Inc.

www.M1914.org

www.bibleforchildren.org

